

# Eta macartane ema Apóstole Juan mayehe ema Gayo, ticaijare

## 3 JUAN

---

### Ema Juan macunacha ema Gayo

<sup>1</sup>Nuti Juan, víyaranapa, nucajurevi piti némunaruquenehi Gayo. Núti yátupihí eta némunasirávihi.

<sup>2</sup>Némunaruquene, nuyaseuchavihi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva. <sup>3</sup>Tétavicavahi eta núsamurevahi, te títecanapa ena vichamuriana, taicha timetacuanapa eta pisuapirahi, péhisirahi eta yátupiqueneana echájjirucávana mayehe ema Cristo. <sup>4</sup>Tájinarínehi tácuti eta núsamurevahi taicha eta nusamairísiraparacahi eta éhisirahi eti nuchichanaveana eta yátupiquene echájjirucava mayehe ema Cristo.

<sup>5</sup>Némunaruquene, tájina táichavahi eta pijacapirahi péchapajirisirahi ena vichamuriana, váhinéni pímatiquenevacáinahíni éna. <sup>6</sup>Te títecanapa ani te viúrujisiavahi, timetacahavianainapa. Tájina táichava eta piúruva, pímicatasiravacahi eta nayanira ena vichamuriana. Eta picaheyare pímiyanavaini eta piúruva nayehe, taicha eta juca víchirahi tacurisamurechayare ema Viya. <sup>7</sup>Taicha éna, táimipaicahi eta nacametarairuirahi eta tiuri echájjirucava mayehe ema Jesucristo. Eta napaisirahi, tájina nayaseserecapahini éna nayehe ena achaneana masuájjiráirahanaríchaha. <sup>8</sup>Tásiha, tavarahaichu eta véchapajirícavaca ena nani, apaesa eta vímicatasihaya éna eta nacametarairuiraya eta yátupiquene tiuri echájjirucava.

### Eta mamuraivahi ema Diótfrefes

<sup>9</sup>Nucajureripa ena pichamuriana te piávihi. Mararihiserá ema Diótfrefes. Éma máurica ticainapupuiricava te namirahu ena achaneana. Éma, vahi masuapa

eta vituparahana. <sup>10</sup>Tásiha, te nutiarihinapa eta ara eyehe, núti nítametacahayare tamutu eta máichaqueneana. Éma, téchajicahi eta viyehe. Cátichacarehi eta máechajiriruvana, váhisera másuapacarehini. Váhivare tácarichu eta juca máichahi. Éma, vahi majacapaimahi ena vichamuriana tipaicanahi. Te natiarihi ena navaraha najacapa, ema maca macavanairipi nacuija nacujacapa. Énerichuvare mavaraha macaerajica te emuri ena tivarahana najacapa.

<sup>11</sup>Némunarquene, vahi picuicutipa ena tíchanahi eta tamauriqueneana. Picutiyaresera ena tíchanahi eta táuriqueneana. Taicha viti víchana eta táuriqueneana, viti machichanaveana ema Viya. Énasera ena tíchanahi eta tamauriqueneana, éna, vahi náimatihíni ema Viya.

#### **Ema Juan macunacha ema Demetrio**

<sup>12</sup>Nutuparacavi pijacapyare ema Demetrio. Namutu nacunacha éma, taicha yátupiquenehi táuriva eta mayherepi. Núti apanavare énerichuvare nucunacha eta máuriva. Píti pímatinuhi, eta tatupiruvahi tamutu eta néchajiriruvana.

#### **Eta táichecuaraqui eta macartane ema Juan**

<sup>13</sup>Tiuri, jucarihi apamuri eta numetaruvianayare. Vuíchahasera numetacavimahi puiti te juca carta. <sup>14</sup>Nútijapainapasera eta ara piyehe apaesa nímahavi. Tásiha, véchajiricavainapa eta vímanasirácacayare.

<sup>15</sup>Puiti, nuvaraha májjaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásiha, péchajisinanu émanapachuina ena nájiriareana núti.

Tamutupa eta juca néchajiriruvahi piyehe.